

Timbalan pengarah, 4 penguat kuasa DBKL didakwa rasuah

Suspek dituduh minta, terima suapan lindungi pusat hiburan haram guna lesen 'Ali Baba'

Oleh Suraya Ali
suraya.ali@bh.com.my

Kuala Lumpur: Seorang timbalan pengarah dan empat penguat kuasa Dewan Bandaraya Kuala Lumpur (DBKL) didakwa atas tuduhan meminta dan menerima rasuah bagi melindungi pusat hiburan tanpa lesen dan beroperasi menggunakan lesen 'Ali Baba'.

Seorang lagi, pegawai penguat kuasa Majlis Perbandaran Kajang (MPKj) didakwa menerima suapan wang tunai RM2,000 daripada seorang lelaki yang mempunyai hubung kait dengan kerja rasminya.

Di Mahkamah Sesyen Shah Alam, Timbalan Pengarah DBKL, Muhammad Irwan Abdullah, 44, dan pegawai penguat kuasa, Zahari Mohamad, 34, didakwa di hadapan Hakim Datuk Anita Harun.

Mereka didakwa dengan niat bersama meminta daripada seorang penjaga premis hiburan berusia 62 tahun, suapan wang tunai RM200,000 secara bulanan di sebuah restoran di Puchong, sekitar Februari lalu.



Suapan itu sebagai dorongan tidak mengambil tindakan undang-undang dan penguatkuasaan ke atas premis pusat hiburan tanpa lesen sah.

Mereka didakwa mengikut Seksyen 16(a)(A) Akta Suruhanjaya Pencegahan Rasuah Malaysia (SPRM) 2009 dibaca bersama Seksyen 34 Kanun Keseksaan.

Sabit kesalahan, boleh dihukum mengikut Seksyen 24 Akta SPRM 2009 yang memperuntukkan hukuman penjara sehingga 20 tahun dan denda tidak kurang lima kali ganda jumlah atau nilai suapan, mana yang lebih tinggi.

Bagi pertuduhan kedua, Muhammad Irwan dan Zahari didakwa mengikut seksyen sama, dengan niat bersama bersetuju untuk menerima suapan wang tunai RM160,000 secara bulanan daripada penjaga premis yang sama di tempat dan masa yang sama.

Muhammad Irwan turut menghadapi tuduhan ketiga, menerima rasuah daripada penjaga premis sama, wang tunai RM130,000



(Gambar kiri) Amran hadir di Mahkamah Sesyen Kuala Lumpur, manakala Zahari, Muhammad Irwan dan Azirin Azali dihadapkan ke Mahkamah Sesyen Shah Alam, semalam.

(Foto Hairul Anuar Rahim dan Faiz Anuar/BH)

sebagai dorongan tidak mengambil tindakan undang-undang dan penguatkuasaan ke atas pusat hiburan tanpa lesen sah di bawah jagaannya.

Mengaku tidak bersalah

Kedua-dua tertuduh mengaku tidak bersalah sebelum pegawai Pendakwa Raya SPRM, Mohd Aliff Shaharuzaman menawarkan jaminan RM50,000 setiap seorang bersama syarat tambahan menyerahkan pasport kepada mahkamah.

Pihak pendakwaan juga memohon mahkamah memerintahkan Muhammad Irwan dan Zahari melapor diri pada minggu pertama setiap bulan di pejabat SPRM terdekat serta tidak mengganggu saksi.

Dalam rayuan, peguam, Mak Kah Keong yang mewakili Muhammad Irwan memohon jaminan dikurangkan kepada RM10,000 atas alasan anak guamnya yang berpendapatan RM9,000 sebulan menanggung isteri dan lima anak berusia empat bulan hingga 17 tahun.

"Selepas dituduh, kami difahamkan anak guam akan digantung tugas dan gaji dipotong. Itu akan memberi kesan secara langsung kepada kewangan keluarga," katanya dan memaklumkan anak guamnya sedia menyerahkan pasport dan melapor diri setiap bulan.

Peguam, Ahmad Faiz Muna-war yang mewakili Zahari pula memberitahu mahkamah, anak guamnya memperoleh pendapatan RM3,000 sebulan dan menanggung isteri serta seorang anak berusia 4 tahun serta ibu yang uzur.

Anita menetapkan setiap tertuduh dijamin RM15,000 dan 30 September depan untuk sebutan semula kes, selain melapor diri pada atau sebelum 7 hari bulan di SPRM Kuala Lumpur, menyerahkan pasport kepada mahkamah dan tidak mengganggu saksi pendakwaan.

Mohon hukuman berat

Di Mahkamah Sesyen Kuala Lumpur, tiga pembantu penguat kuasa DBKL dituduh di mahkamah berasingan atas dakwaan menerima rasuah bagi melindungi premis perniagaan yang beroperasi menggunakan lesen 'Ali Baba'.

Syahrul Riza Md Yusof, 42, mengaku bersalah atas lima pertuduhan mendapatkan wang bernilai RM1,200 di Pasar Harian Selayang, antara 27 Disember 2022 hingga 20 Jun 2023 dan dikenakan hukuman denda RM13,000.

Bapa dua anak itu yang berpendapatan bulanan RM3,000 membuat pengakuan berkeenaan di hadapan Hakim Azura Alwi sebelum memohon mahkamah

menjatuhkan hukuman ringan kerana menanggung dua anak dan menjaga ibu bapa serta komitmen pinjaman bank.

Bagaimanapun, Timbalan Pendakwa Raya, Irna Julieza Maaras memohon mahkamah menjatuhkan hukuman berat kepada tertuduh sebagai pengajaran kepada masyarakat dan tanda mahkamah serius membanteras rasuah daripada menjadi barah.

Azura kemudian memutuskan denda RM2,500 masing-masing bagi setiap empat pertuduhan atau hukuman penjara enam bulan jika gagal bayar, manakala denda RM3,000 atau lima bulan penjara bagi satu lagi pertuduhan.

Dalam prosiding di Mahkamah Sesyen berlainan di sini, dua lagi pembantu penguat kuasa DBKL mengaku tidak bersalah atas pertuduhan kes sama di hadapan Hakim Suzana Hussin, manakala pendakwaan dikendalikan Pegawai Pendakwa SPRM, Atiqah Ab Razak.

Muhammad Syawal Riezqan Jauhar, 28, mengaku tidak bersalah atas 11 pertuduhan menerima wang RM4,800 daripada seorang individu di Pasar Harian Selayang, antara 26 Oktober 2022 hingga 15 Ogos 2023.

Mahkamah menetapkan wang jaminan RM6,000 serta syarat tambahan melapor diri di pejabat SPRM Kuala Lumpur, menyerahkan

kan pasport serta tidak mengganggu atau berhubung dengan saksi sehingga perbicaraan selesai.

Seorang lagi tertuduh, Amran Mat Dali, 45, juga mengaku tidak bersalah atas pertuduhan menerima RM100 daripada individu sama di lokasi sama, kira-kira jam 10.30 malam, 19 April 2023.

Tertuduh melalui peguam, Mohd Baharuddin Ahmad Kassim memohon jaminan semimum mungkin dengan alasan berpendapatan RM3,500 dan menyara isteri, tiga anak masih bersekolah serta bapa berusia 70 tahun.

Suzana memutuskan denda RM5,000 serta syarat melapor diri di pejabat SPRM Kuala Lumpur, menyerahkan pasport serta tidak mengganggu atau berhubung dengan saksi sehingga perbicaraan selesai.

Mahkamah kemudian menetapkan 18 dan 19 September untuk sebutan semula kes kedua-dua tertuduh yang didakwa mengikut Seksyen 165 Kanun Keseksaan, membawa hukuman penjara sehingga dua tahun atau denda atau kedua-duanya jika sabit kesalahan.

Dalam kes berasingan di Mahkamah Sesyen Shah Alam, Pegawai Penguat kuasa MPKj, Azirin Azali Ramli, 48 didakwa menerima suapan wang tunai RM2,000 daripada seorang lelaki yang mempunyai hubung kait dengan kerja rasminya.

Dia dituduh mengikut Seksyen 165 Kanun Keseksaan dan boleh dihukum mengikut Seksyen 165 kanun sama, yang memperuntukkan hukuman penjara maksimum dua tahun dan denda atau kedua-duanya jika sabit kesalahan.

Azirin Azali yang diwakili peguam, Vasudevan Appu dituduh melakukan kesalahan itu pada 24 Mei lalu dalam sebuah kenderaan jenis Lexus bertempat di petak parkir depan premis perniagaan di Hulu Langat.

Dalam rayuan, Vasudevan berkata, anak guamnya yang sudah bercerai berpendapatan RM5,700 sebulan dan menanggung tiga anak berusia 16 hingga 24, termasuk dua sedang melanjutkan pengajian di universiti.

Mahkamah membenarkan tertuduh diikat jamin RM10,000 dan syarat tambahan melapor diri pada atau sebelum 7 hari bulan setiap bulan di Pejabat SPRM Putrajaya serta pasport diserahkan kepada mahkamah, selain menetapkan 2 Oktober depan untuk sebutan semula kes.

Pendakwaan kes dikendalikan Pegawai Pendakwa SPRM, Mohd Aliff Shaharuzaman.